

欽定剿平粵匪方略

欽定勦平粵匪方略卷七十二 癸丑年

十二月初七日 丁丑 曾國藩奏言 臣接奉

諭旨令挑選練勇雇覓船隻順流東下與江忠源水陸

夾擊 臣查自田家鎮失防以來督 臣吳文鎔撫

臣駱秉章與 臣往返函商至十餘次皆言各省

分防糜餉多而兵力薄不如數省合防糜餉少

而力較厚卽與張芾江忠源函商亦言四省合

防之道兼籌以勦爲堵之策臣前月覆奏一摺
曾言舟師辦有頭緒卽由臣親自統帶駛赴下
游是未奉此次

諭旨之前臣之志已思率師東下一紓積憤矣惟礮船
一件實有不宜草率從事者臣前發摺後卽鳩
工購材試行造辦成造樣船數隻皆以工匠太
生規模太小不足以壓長江之浪不足以勝巨

礮之震近由撫臣處送到水師守備成名標一員又由督撫臣處咨到廣東繪來之拖罟快蟹船式二種始細加講求照快蟹之式重新製造現已先造十號更須添造二三十號計必中官能載千餘斤之礮兩旁能載數百斤之礮乃足以壯軍威而摧逆燄惟新造之舟百物未備雖日夜趕辦亦難遽就必須一月以外乃可下河

欽定大清會典事例
卷一百一十二
二

至價買舊船修改艙面其用力稍省其爲日自
少然至二三百號之多亦須一月餘之久至拖
罟船隻本奉

諭旨令兩湖督撫照式製造者武昌現在照造未知合
用與否衡州匠少技拙現在尙未試造前經奉
旨特派之廣西右江道張敬修帶有工匠自粵來楚若
到湘尙早臣當令其趕辦如到湘太遲亦不能

信陽州城接准湖北撫臣崇綸咨稱黃州府屬之巴河地方仍有逆船往來游駛先於十四日有賊船百餘隻竄入黃州所轄之鵝公頸一帶小河內有竄擾麻城宋埠之意等語信陽州距巴河陸程僅數百里麻城近與豫境接壤賊蹤靡定必須擇要嚴防查信陽州南九十里之武勝平靖兩關均爲自楚入豫門戶黃土關亦與

湖北應山縣連界均應分兵固守以杜竄越現
派遊擊陳昌猷等帶兵分駐三關並令知府廖
牲督帶兵勇駐紮羅山以期周密又光州所屬
固始商城光山等縣俱與楚皖毗連探聞安徽
舒城一帶賊氛猶熾臣前飭參將希拉布等帶
兵一千二百餘名分駐防守尙乏大員統帶現
在南陽情形較寬臣已飛飭鎮臣柏山酌留兵

聞

勇駐守南陽搜捕土匪一面帶兵數百名馳往
光州督率守禦臣卽駐紮信陽州隨時相機調
度奏入報

同日江忠源奏言上月二十三日該逆環攻郡
城槍礮如雨經兵勇奮力抵禦自戌至丑賊始
敗退昏黑之中不知斃賊多少二十四五六等

日疊有斬擒二十六日夜閒該逆乘夜偷過城濠偏近城根各紮營一座以爲開挖地道之計五更月出我兵始行看出當卽督飭都司馬良勳等帶領開化勇本地勇於水西門月城穴牆而出直撲賊營並令臣自湖北帶來之親隨楚勇四十名帶同本地練勇從紫金堦縋城而下牽制大西門一帶賊匪馬良勳等帶勇撲近賊

營各勇奮不顧身，偏近牆根，拋擲火彈，該逆驚亂。各勇乘勢，一面將營牆拆毀，一面奮力攻擊，斬獲長髮賊首級一顆，擊斃賊五六十名。該逆敗入濠外高坡營內，大西門及紫金埂一帶賊營果出隊前來救應。經楚勇頭目鄧善珍等督率眾勇橫出攔截，鏖戰一時之久，賊抵敵不住。各勇乘勢燒燬賊營一座，約斃賊匪六七十名。

又令程智泉帶領廣勇從小東門穴牆而出攻奪賊營斃賊二三十名是日燒燬賊匪新營二座舊營一座各處共斃賊匪一百五六十名馬良勳頭上肩上均受微傷惟得勝門外新營尙未焚燬深爲可慮是夜令把總尙得勝帶領六安勇乘夜縋城而下傍城紮營至二十八日黎明營盤甫成該逆數千人蠶擁而至尙得勝督

令衆勇在營內施放槍礮都司楊煥章督率川
兵及本地勇在城上施放槍礮賊勢雖猛近城
卽斃臣復調楚勇帶同六安勇從大西門前往
接應楊煥章見賊勢跳躍將近兩時其氣已竭
督令兵勇下城尙得勝亦督勇出營奮力攻擊
再接再厲該逆抵敵不住大敗逃奔我兵乘勢
追殺斃賊百數十名生擒十九名焚燒賊新營

一座舊營四座尙得勝徧身受火罐傷午正收
隊入城楚勇六安勇至大西門該逆點發地雷
轟倒大西門月城十丈六尺該逆蠶擁而上經
湖南舉人鄒漢勛身先士卒帶領楚勇開化勇
四川兵六安勇奮力抵禦將賊擊退追出缺口
外抵住賊匪趕用沙袋石塊修築約有五六尺
高始將城外兵勇撤進至酉正修築完整高與

城齊斃賊五六十名當賊匪攻撲得勝門時復分股攻撲南門小東門均經擊退斃賊數十名是日該逆以大股猛攻得勝門復分股力攻南門小東門兼用地雷轟倒大西門月城勢甚危險仰賴

聖主威福各處均獲勝仗並將地雷轟塌之處登時搶護化險爲平是夜該逆復於水西門外偷過濠

溝紮營二座二十九日黎明仍令馬良勳徐懷
義帶領開化勇本地勇縋城而出奮力攻撲各
勇偏近賊營該逆拚死來爭各勇亦拚死抵禦
自卯至酉約斃賊匪二三十名是日賊匪攻撲
小東門紫金埂各處小東門之賊被程智泉督
率廣勇擊退斃賊十餘名紫金埂之賊經楚勇
帶同本地勇擊退並下城追擊斃賊二十餘名

臣接陝甘總督臣舒興阿來函知已帶兵於十五六日自陳州起程前來救援又得已革臬司張印塘來稟在店埠收集玉山殘敗兵勇六百餘名又新招江南大營遺散之川勇一千名並與編修李鴻章招集各鄉團練現在趕辦鍋帳器具一俟齊備卽當進偏城下文探知音德布於十一月十九日與賊接仗未能得手現已紮

營城西二十里外臣業經分別咨行催令速進
惟查城外賊營四面林立各路援兵能否直達
城下尙難豫定奏入

上嘉之

初八日戊寅僧格林沁奏言臣自十月初六日移

營王慶坨時相度地勢自王慶坨營盤迤南數
里卽係大清河積水漫淹一片接連子牙河直

至獨流中祇有葛淀隄一道疊經派員查看隄岸寬僅丈餘至數尺不等南北兩面皆水礙難紮營臣限於地勢是以暫在王慶地駐紮查王慶地地當緊要南有大隄可以扼賊北竄之路東距天津楊村較近各處如有警報臣均可帶兵策應易於截擊因此仍在王慶地駐紮並爲設法監造各樣攻勦器具運赴前敵以資各路

分用茲據勝保奏稱第六府爲獨流要路令臣
相度地勢移兵前進查獨流地勢除勝保於東
面紮營堪以進攻此外皆係冰水其第六府地
方祇有數尺寬隄雖閒有水落處所地面狹窄
實難安營況臣移營第六府與勝保合力攻剿
賊如北竄又成尾追之勢因仍扼紮王慶坨遏
賊北竄奏入

上命軍機大臣傳諭僧格林沁曰現在獨流逆匪經大
兵攻勦勢已窮蹙自以防其乘虛北竄爲要旣據該
大臣體察情形仍須駐紮王慶坨以備策應著仍於
該處扼要堵勦並當飭令副都統伊勒東阿那敷德
副將史榮椿等嚴密防範現值天寒冰結尤應晝夜
巡查不可稍涉大意該大臣統領重兵爲京師屏障
責任綦重想已統籌全局布置周妥設有疏虞惟該

大臣是問

上又命軍機大臣傳諭勝保曰據僧格林沁奏查看第
六府地面狹窄實難安營已諭令僧格林沁仍駐紮
王慶坨責成專防後路矣勝保勦辦獨流逆匪已逾
兩月尙未能掃穴擒渠實屬延緩近日移營前進偏
近賊壘建築礮臺晝夜環攻自應得手惟連日未見
奏報殊深懸繫該逆雖堅匿不出亦須設法轟擊分

路進攻或誘令出巢設伏截擊不可任賊負嵎疲我
兵力現在防禦後路既專責僧格林沁進剿賊巢勝
保亦責無旁貸著卽督率帶兵各員剋日進攻至靜
海城內賊匪近日情形及西凌阿善祿刻下如何攻
剿之處並著該大臣迅速據實具奏

同日琦善陳金綬奏言查揚城賊匪不得已而
思竄難保其不意存繫戀伺隙重來此時自以

保守城池繕完守具爲第一要務無如鄉勇之潰散者復紛紛入城乘機肆擾伏思前此鄉勇萬人一闕而散何以不先不後適當賊至之時苟非先期約定何能如此齊心其情節種種可疑現在臣琦善惟派弁兵駐守而嚴禁鄉勇入城一面與雷以誠慧成函商或行遣散或歸原營以便稽查而免擾累又以六合浦口均係江

北要隘誠恐賊匪逃竄之後復分股沿江窺伺業已抽撥官兵二千名遣員帶領馳往六合浦口會同駐守六合之德崇額等及駐守浦口之武慶等暫時協同防剿至儀徵縣城尙爲賊踞其毗連儀徵之天長縣亦北通五河盱眙臨淮之路現查地方尙屬安堵惟賊匪棄城而逃三窟已失其一在逆匪未必甘心現在賊船尙聚

瓜州仍添賊固守儀徵之賊又由樸樹灣直至東西石人頭凍青鋪時時窺探虛實既須防賊之再來尤須防賊之分擾儻六合浦口並無警報卽當先復儀徵再攻瓜州庶方隅之中妖氛淨掃奏入

上諭曰募勇原難其不通逆總在駕馭得宜不致欲用不可欲逐不能以致牽累好兵不能打仗

初九日己卯勝保奏言初六日卯刻臣商令德勒

克色楞前赴礮臺列隊守護相機轟擊令德興
阿恭鈺等攻擊獨流北面瑞麟帶新到之兵在
後列隊遙助聲勢防其衝突臣親帶火器營正
定宣化各隊官兵一千餘名由葡萄窪繞冰而
過前赴獨流以南相度地勢以便挖斷隄埂使
該逆不得往來自由是時松玉及副將史榮椿

等各營官兵已在王家營隄岸一帶排列隊伍
並據報西岸賊匪數百已被擊敗臣卽乘馬上
隄聞靜海迤北槍聲甚多知係五里莊一帶接
仗卽派吉林黑龍江馬隊五百名前往接應並
遏靜海逆賊救援獨流之路復調西甯河州兩
營官兵在臣後面作爲接應布置甫就忽聞賊
巢一片聲喊撲出馬步賊匪二三千名狂奔而

來又由西岸撲出賊數百人直奔松玉等隊臣
急令我兵分作兩翼迎擊並隔岸催調松玉等
官兵一齊前進因松玉等兵單並抽撥擡槍隔
河夾擊兩岸槍礮連環擊倒賊旗數十桿賊屍
順隄滾下不計其數逆衆登時敗退入壘正欲
傳令暫撤逆賊忽全股出巢捨命撲來並有騎
馬賊二三百名意欲抄臣之後臣見賊出甚多

拌死前來因急策馬出陣麾令隨身小隊馬步
兵二百餘名由隄岸奮力迎擊各營兵勇見臣
親率向前遂各奮勇百倍擊斃騎馬賊三四十
名馬奔賊敗自相衝入賊隊一時驚潰我兵乘
勢掩殺並將其中隊執大黃旗賊目砍倒逆勢
不支紛紛披靡隨追隨殺積屍遍野旗幟刀矛
拋棄滿地德勒克色楞在礮臺上見賊匪衆多

卽督令施放大礮轟擊賊匪無處躲閃被礮子擊死甚多統計此次攻戰一日之久殲斃逆衆七八百名實足以快人心而褫賊魄惟相度地勢若在獨流靜海中間橫紮營盤腹背受敵非官兵三四千不可如任其往來奔救反覺賊勢合而我勢分臣總期設法盡殲醜類或先將其往來隄堦空斷絕其救援一面日日進攻使之

糧絕心亂庶可奏功奏入

上命軍機大臣傳諭勝保德勒克色楞曰勝保此次兜
剿尙屬得手惟靜海獨流之間賊匪時時勾結救援
使我兵腹背受敵必須斷其接應攻剿方能得力所
稱橫紮營盤空斷往來隄埂絕賊救援之路卽著密
速籌辦豫爲布置現在賊勢窮蹙已極各路官兵不
爲不厚該大臣務須激勵將士剋日掃穴擒渠毋再

遷延貽誤

同日福濟奏言臣前行抵邵伯鎮具摺奏調遊擊嵩瑞平橋兵四百餘名業蒙

允准當卽移知南河督臣以便飭營遵照趕令起程乃

於初三日接淮南河督臣咨文因揚城已復恐

賊北竄仍令前漕臣李湘棻帶領嵩瑞兵四百

餘名趕往蔣壩竊思揚郡賊已南去北面似可

無虞雖蔣壩爲天長六合後路詰奸緝匪未可
稍疏但廬州被圍十分喫緊臣所謂漕標各營
兵尙無到浦音信不得已移緩就急懇乞

天恩俯准仍將遊擊嵩瑞千總張鼎元之兵共七百名
帶往俾可迅速前進其前調及增調鹽城營與
續調東海營共兵五百名俟到齊後統交南河
督臣派防各處一轉移閒實於防勦有益奏入

上是之

十一日辛巳琦善陳金綬奏言慧成自到揚以來

住居灣頭船上擁兵自衛從未親臨戰陣現除
收回潰勇不計外其所帶之兵共有一千四百
七十名皆在灣頭臣琦善以目下揚城無賊尤
宜重扼東南因咨會慧成移營前進以防揚城
東面詎意慧成並不咨商亦不前進徑調防守

便益門之總兵多隆武帶兵四百名移紮五里廟狼山營兵三百名移紮沙河橋臣查該總兵多隆武等駐兵便益門外本屬不可移動又非久經行陣之兵萬不足恃慧成向於撤兵調兵重務並不向臣琦善咨商以至賊至勇散無從先期調度至剿捕逆匪事權須一前此十一月十一日約定慧成福濟派勇赴三汊河協剿行

至中途被福濟令箭截回亦未向臣知會軍務
各自任性焉能協力同心加以帶兵各大員往
往意存諱飾工於取巧晉康查文經防堵徐凝
鈔關兩門所有師長鑣等各營之勇悉聽其檄
調迨瓜州之賊竄過施家橋揚子橋兩路師長
鑣營勇已潰正應竭力堵禦乃晉康卽退至灣
頭查文經又經慧成調回致內外賊匪聯爲一

片其咎宜有所歸

同日雷以誠慧成奏言揚城餘匪雖竄而附城
數十里內賊營尙未全撤恐其以退爲進乘虛
北竄現在灣頭僅存兵一千數百名間有未散
之勇亦斷不可恃查灣頭爲四通八達之區水
陸兩路均可上窺清淮臣等扼守灣頭實爲力
爭上游之計茲據琦善移稱東路以揚子橋寶

塔灣鹽捕教場爲藩籬令臣慧成移營前進分
布是撤北路之屏蔽也設賊竟長驅而窺清淮
勢將不可復問查琦善現統重兵九千餘名與
其擁以自衛置有用之兵於無用不若分布各
路以顧大局而防北竄所有琦善請撤灣頭大
營分布東路之處萬不可行均奏入

上命軍機大臣傳諭琦善陳金綬雷以誠慧成曰雷以

誠慧成奏琦善請移灣頭大營分布東路萬不可行
復據琦善陳金綬奏查明東路帶兵大員諱飾取巧
各一摺朕閱該大臣等所言各情仍是各挾私意誘
過於人琦善統領諸軍各路帶兵大員均歸節制東
路勇潰雷以誠慧成固屬罪無可辭琦善又豈能坐
觀成敗徒以一衆了事雷以誠所築礮臺無礮無兵
各營礮位無人收管慧成悉將各營兵丁撤回退保

灣頭似此畏葸無能一籌莫展殊堪痛恨現在瓜州賊船千餘隻尙未開行究竟賊勢欲竄何處該大臣如何進攻如何堵截全未籌及惟知與雷以誠等互相詆毀竟置大局於不顧是誠何心前有旨令陳金綬徑赴揚州東北一帶扼要駐紮著卽飭令陳金綬迅速帶兵前進嚴防揚城東面並可追勦瓜州等處賊匪該逆詭譎異常揚城雖已退出難保不乘間復

圖北竄琦善卽嚴飭雷以誠慧成等扼守萬福橋灣頭一帶要隘並非令其株守一隅亦須隨時相機接應儻雷以誠慧成等藉此遠避不加奮勉卽著該大臣秉公嚴叅朕必治以重罪

十四日

甲申

勝保奏言逆匪占踞靜海獨流之時

老賊及裹脅者不下數萬人騎馬賊目約有數千自臣等攻勦以來大小數十戰殲斃解散已

有十之六七現在賊勢日蹙合查兩處賊衆不能過萬而騎馬賊亦不滿千賊情惶惑糧草日絕且直隸山西等省被脅之衆經臣設法解散日來逃出甚多訊據逃出難民供稱自築礮臺後礮子打入賊營傷斃不少雖老賊亦未嘗不心膽俱寒無可爲計然惟其計窮則思竄愈力惟其死守則攻勦更難臣惟有嚴飭各路晝夜

嚴防一面於獨流南面窆築營盤以斷賊援然隄堧爲逆匪往來咽喉之地我兵紮營腹背受敵我旣斷其救援賊必死相爭護其地至險其守甚難自初六日我兵獲勝臣逐日親至其地意欲誘賊出巢而賊畏創不出查梁王莊大營南至葡萄窪約三四里葡萄窪斜至隄堧最近之處亦約三里此三里之中必須連築營盤四

五座每座撥兵四五百名庶可聯絡聲勢斷賊
應援然非久經戰陣之兵仍恐扼守不住臣所
統各路官兵雖二萬數千名而周圍地方遼闊
四十餘里除分駐靜海兩岸並西南西北各路
防兵外大營所存馬步隊不過八千獨流北岸
防勦官兵連瑞麟所帶之兵又去二千餘名羅
古莊等處又撥去堵勦兵勇二千餘名臣每日

進戰之兵不過三千有餘幸有川勇楚勇千餘
名天津勇千名以助兵力之不足設法調度勉
資攻勦現在若就攻勦之兵抽派葡萄窪一帶
防護隄路極力籌撥祇能分出數百名已不足
守禦再四籌度查有前奉

諭旨防堵德州之將軍瑞昌帶兵一千名又駐紮鹽山
屬新店地方藩司崇恩帶兵勇一千餘名均距

靜海不遠臣以爲遠堵不如近備已杜謫崇恩
管帶兵勇移營前進並咨調瑞昌亦來靜海復
商令善祿俟其兩路兵到卽酌量抽撥勁旅一
二千並就臣營中久戰之兵再行抽撥數百名
在新築營壘紮住以便圍剿得手現在督集兵
夫築壘再竭數日之力營壘可成卽當密速籌
辦斷其往來接應一面復飭委員增修礮臺將

大礮併力轟擊斷不敢稍留餘力有失機宜奏
八

上諭曰一切布置尙妥是時萬不可再令竄逸今歲總
要滅盡朕志已定不可漫視

勝保又奏言查逆匪竄踞靜海獨流於茲二月
揆其情勢委極窮蹙俟其食竭力盡而取之事
當易如反掌但今日事勢迫不及待自以愈速

愈妙若論勦賊之法兵法所謂不戰而屈人之
兵爲上策其次則以縱爲擒兵法曰利而誘之
又曰圍師必缺審計賊所必出之道故示其瑕
以誘其來暗於前途握要之地設數伏以待之
而大兵復從後躡之賊屢陷伏必無生理此外
則惟督兵攻撲之一法但冒死衝突夷傷必多
賊知死在目前勢必拚命相角以貔貅爪牙之

兵易延頸待斃之命竊以爲非計之得也連日
督兵攻勦該逆懲於屢敗藏匿不出臣萬分焦
灼日與德勒克色楞達洪阿瑞麟及營中將校
和衷商榷皆以前二策爲握要之圖然臣猶不
敢自恃仍刻刻相機觀釁如稍有可乘之隙卽
當捲甲疾馳迅圖克復奏入

上諭曰覽奏各情欲稍加寬假以冀獲全此功然時勢

不同是時斷難寬假直省肅清南省逆賊自易勦洗
勝保又奏言據西凌阿善祿咨開本月初六日
辰刻我兵列隊在東隄新濠之外午刻忽見賊
由南門擁出數百人轉東疾行意在奔竄我兵
向前迎擊賊衆踏冰東奔我兵亦履冰追擊該
逆復出數百人順隄南來我兵槍礮齊施兩股
賊匪見我兵攻擊甚猛衝向東南我兵又一齊

截殺斃賊無數賊卽敗回靜海不出又據撥防
斬家莊大粉堆地方帶兵官稟稱於初九日忽
由靜海擁出賊匪馬隊一百餘名並隨從逆衆
約三四百名意欲探路逃竄經我兵擊斃騎馬
賊十餘名該逆敗入靜海賊壘臣仍飭各營兵
勇隨時加意嚴防奏入報

同日雷以誠慧成奏言查古人建寨築礮堅壁
清野實爲防禦流寇第一良法按江南地勢大
半溝塍汊港設險爲難建築非易惟有以寨爲
堡以土爲砦倣按戶抽丁之法作深溝高壘之
謀節經臣等選派幹員親爲區畫先於東北黃
泥溝沙河橋一帶官爲興辦就舊溝小港因寬
加深卽以挖溝之土加築爲砦環城而南計長

三十餘里計砦百十餘座並雇民夫守砦以濟
兵勇之不足儻遇有警一砦鳴鑼衆砦皆應俾
各營得以準備其邵伯仙女鎮等處亦經 臣等
分委員弁出示勸諭均已一律興辦至裏下河
各州縣現亦委員前往相度地勢會同地方官
變通籌辦惟恐將來日久生懈應請

飭下督撫責成各該州縣永遠遵行

雷以誠又奏言本月初五日五品銜張翊國督同千總張德龍帶勇攻打施家橋之南花園莊賊匪土城該匪出戰張翊國令各勇斜衝抄斷賊隊擊斃賊匪多名並經張德龍手刃長髮賊目兩名賊衆退入土城八品頂戴王桂蘇太開放火箭火彈將該土城燒燬賊乘火逸出我勇追斬無算現在施家橋已無賊蹤奏入

上命軍機大臣傳諭琦善雷以誠慧成曰堅壁清野原
爲防勦豫籌良法凡賊氛偏近地方自應相度形勢
隨時辦理現在揚城逆匪雖已全數竄出難保不再
肆搶掠荼毒居民所有黃泥溝沙河橋等處雷以誠
等擬派幹員築堡建砦以爲守禦之計自係應辦之
事著琦善體察情形如實於地方有益卽令雷以誠
慧成妥爲籌辦其附近各州縣應行倣照辦理之處

並著該大臣剴切曉諭使紳民人等踴躍從事以收衆志成城之效

上又命軍機大臣傳諭琦善曰前據琦善奏張翊國棄施家橋而不守當經降旨將該弁發往新疆矣茲據雷以誠奏稱張翊國等於本月初五日攻打施家橋燒燬逆匪土城追斬無算是否係雷以誠飾詞入奏爲張翊國希冀免罪地步抑係張翊國實有出力之

處著琦善秉公確查據實具奏

同日吳文鎔奏言自賊船下竄以來因水路船
礮未齊水勇水手亦未募足祇能酌量撥兵由
陸路設法攻擊不克水陸並進剋期大舉是以
一面與撫臣崇綸商催造船鑄礮選募水勇一
面與前任禮部侍郎臣曾國藩往返函商囑曾
國藩在衡州府亦趕緊改造船隻雇練水勇一約

於正月間統帶舟師由南至北與臣會合前進
無論賊船在楚在皖總必極力窮追痛加剿洗
以期一鼓殄滅此臣曾國藩所云合四省之力
掃此賊氛卽臣與曾國藩籌剿之大略也臣賦
性迂拙事期踏實因籌勦各事宜正在辦理尙
未就緒不敢先事鋪張懇臣崇綸遽欲以雇船
派兵懸虛未集之事遂爲力籌勦賊經臣再三

勸阻以致不肯會銜奏事茲欽奉

諭旨因田鎮既有賊營巴河尙有賊船分踞黃州之賊亦復不少

命臣親督官軍出省督戰不准守候船廠造齊致滋延誤查現在黃州以下均有賊蹤而切近省城自以黃州爲緊要臣謹遵

旨親督官軍趕緊渡江馳赴黃州一帶相機督戰先將

聞

黃州之賊勦除節節跟追以期肅清楚境彼時如北省船礮兵勇備齊會國藩統帶舟師陸勇由南省前來便可水陸並進掃蕩妖氛奏入報

吳文鎔又奏言現在臣遵

旨帶兵出省督戰撫臣崇綸欲臣暫且不必出省謂防勦必須兼顧臣兼權熟計現帶兵四千出省防

城兵勇尙有六千又添調滿兵二千城守亦不
爲單再四籌商仍應遵

旨出省督戰或先將陸路之賊次第翦除少一路賊匪
庶百姓早獲一日安全奏入

上是之

十五日乙酉慧成奏言前次賊自儀徵至運河支

搭浮橋自西而東琦善各營均在西岸並不嚴

防截殺明知臣兵力單薄不肯撥兵相助備賊
由東路北竄大局將不可問現在琦善擁兵不
動藉搜捕餘匪撫恤難民爲名逗留揚州令賊
遠颺相應請

旨飭令琦善趕緊酌撥勁旅分駐揚州東路一面派兵
跟追敗匪所有揚州撫恤各事宜無須琦善身
親其事應責成地方官迅速妥爲辦理奏入

上命軍機大臣傳諭琦善曰此時逆匪全在瓜州儀徵一帶正宜督兵進剿慧成等兵力既單且驚潰之餘豈能望其復振該大臣統領全軍責無旁貸務卽先行設法收復儀徵毋得株守揚州擁兵不動至揚城撫恤事宜應卽責令地方官妥爲經理其瓜州一帶賊匪並著飭令陳金綬督兵追剿扼要堵截以遏賊匪分竄之路

同日蔣爵遠奏言貴州卽用道黎平府知府胡林翼奉

旨留於湖北交吳文鎔崇綸差遣委用查胡林翼先經委赴鎮遠一帶防堵楚匪交卸府篆嗣後事竣因值甕安縣榔匪滋事委令前往查拏現在該匪首要就獲地方安靜卽飭胡林翼馳赴湖北聽候差委奏入報

三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十